

摘藻堂四庫全書薈要

集部

欽定四庫全書薈要

集部

雞肋集卷五十八

六至

詳校官助教臣謝登雋




欽定四庫全書薈要卷一萬五千三百二十三

集部

雞肋集卷五十六

宋 晁補之 撰


謝授館職啟

誤緣公舉既不能引分而終辭濫俾試言又不獲竭愚
而小補自宜汰斥尚玷題評祇有矜慙安知榮觀竊以
校讐之設始於漢氏之購書員品之增盛於唐室之好

士故二代禮樂聲明之為備亦一時衣冠人物之使然
惟麒麟延閣之華近閭闔鉤陳之邃至謂道家羣玉之
府蓋象天宮東壁之藏近稽有宋之隆專號育材之地
故招來於閒暇之日而官使於成就之時職非要而地
嚴欲知其可貴祿已優而責寡使得以自修恭惟治平
之初深有講求之意詔四三輔選二十人當時彬彬最
號得士厥後往往奮為名臣建神考之末年起治官之
廢典是正蘭臺之秩以延虎觀之儒而龍胡莫攀風御

已遠欽文母思齊之聖當成王求助之初咨謀大臣修
舉故事繫詔書所以取之之意則欲其有行義政事好
學而能文至策問所以攷之方又欲其知忠厚勵精
扶衰而救溢竊思在上詳延之若是則觀異時施設之
謂何宜得譽髦以副側席如補之者系出簪紱單平之
後才非丘園耿介之良不意姓名之無聞乃煩丞弼之
過聽昭回地近英俊朋來閱九奏於洞庭徒知神駭飛
雙鳧於渤海更覺身微加以陟岵水悲卧漳久蕭孤將

五千之卒空有壯心立解十二之牛曾無敏手雖欲自
勉竟不能竒攷古不究其本根議政終成於迂濶主父屢
困九事敢期於八收公孫太疎十策乃微於一得正使
焦頭而爛額猶足為功真成毀瓦而畫墁尚容見食服
訓辭之甚厚預刊緝以為榮非止見黃香未見之書以
資雜博亦欲正劉晏不正之字固有愚衷靜言所遭良
出於幸斯蓋伏遇某官幾微謀國忠蓋致君深明致治
之原要在得人之盛

蘇公軾云傳百聖道為一世師
不待文王而興自任伊尹之重

大

儒之効吾道方興多士以寧斯文永賴顧容淺陋亦誤
采收昔班超以秉筆得令史而不慙陽城以愛書從院
吏而自給彼皆慷慨有志之士敦朴可用之才苟得以
文墨而効官則雖為卑賤而可喜而況加以樂育借之
美名方朝廷耆艾之具來與巖穴幽竒之咸在世逢有
道之會人望太平之期屬當是時乃在此選雖復中才
之難彊猶將奮發於有為補之願治氣養心修辭居業
粗希前輩豈惟文字之末流未負平生儻以功名而自

致

揚州謝執政啟

囊空坐笑輒傾將母之誠鈞播無私偶遂佐州之請意
雖甘於遠外跡終涉於干摩伏自思惟良深震慄竊以
聖人在上孰不懷利見之心君子處躬蓋亦有常分之
守智足以圖則當畢慮力可以任則宜竭能固有埽曹
相之門而藉以求通客常何之舍而因茲得召志義有
在黃綠不嫌其次實事未聞虛名可貴所以樊英聘而

漢稱得衆禰衡棄而魏為失人雖非車輿輓軓之利行
猶曰園林鴻鵠之為觀凡是二者必居一焉如補之者
質薄自憐學迂寡用陛下纂極之日羣公入輔之初旁
搜廢捐不間疎逖亦預諸生之選入陪三館之遊朝廷
清明官省閒暇鶴鷺逸翮競高舉於丹霄麋鹿野心終
自懷於豐草仰慙教載之惠未知補報之期願試米鹽
且親甘旨魏君僕被非見汰於盛時蕭子抱關亦各從
其私好此蓋伏遇某官引君以道附衆以文養材無一

介之遺建官必羣議之與發為久大故能贊於乾坤馴
致中和蓋將興於禮樂夫何小醜首玷至公江陽故都
民俗信美矧備倅貳足竭疲駑尚假歲時不慙刻鵠之
類驚庶幾平昔未忍轉衣而為棠誓殫勤勞粗有寸尺
仰酬覆燾之德次納甄陶之仁

齊州謝執政啓

擢躋中祕九換歲華巧補外官兩從私便惟愚踈之何
有實幸會之已多弛負云初拊躬以惕伏念補之總角

之歲粗習義方始冠之年即嬰家難奮饑寒而自立信
詩禮以無師偶塵科名遂列學校至預讐書之選悉緣
試藝而升蓬蒿仲蔚之園風雨子桑之屋技無庸而常
佚老將至而自驚是以陪羣俊而遵循思古人而緬邈
自請試事庶幾食功還朝適已踰年於法又當為郡遂
上煩於聽察因俯徇於恂悰假以名城榮其將母既無
烹鮮製錦可採之譽滋有羸瓶脫輻不勝之憂斯蓋伏
遇某官以道事君有功及物推明先朝典章文物之具

崇養在位靖恭正直之心蓋欲羣工助成累盛故茲優
寄猥逮非宜忘朽木之難雕責駑馬以勿舍人安其分
事可以興况復此邦素稱難治某自顧無術但知用心
豈惟鄉飲盥洗才薄不足以化民亦恐柱後惠文威克
未可以濟務尚稍寬於轡策得小假於歲時倘有秋毫
上酬鈞造

湖州謝執政啓

承流已幸易地更優荷平施之每加撫中情而屢愧伏

念補之稟生鄙滯逢世盛明學術素疎入必更文字之
選吏能何取出猶當民社之行且復數竒寡偶孤莞未
隕之餘而幸刮垢磨光寬大兼容之際蕭條起廢跼蹐
臨官常欲隨其所遇而必竭筋力之能倘可無歉於心
而粗塞廩食之責而况河東股肱要害之郡吳興山水
清遠之邦不緣丐求繼用付畀未覺川塗之邈但知舟
楫之安自顧何人所蒙若此斯蓋伏遇某官夔龍著業
丙魏揚聲般役衆工雖各趨而皆當醫調百藥蓋異用

而咸宜故此下材尚叨器使受恩必報思擁篲以無從
陳力不能念乞身而未可

上曾樞密啟

名還禁闈擢貳樞庭凡在陶鎔舉增慶幸恭以某官忠
良舊望經濟闕才被遇先朝迴翔近列文章潤色豈徒
詔令之間樽俎折衝蓋出精神之動偉聖謨之獨運藹
賢德以具來果膺揀圖首預機政某蚤緣世舊實被甄
收帳坐繫於守麾阻趨承於台屏歡欣踴躍倍萬常情

南京謝李中書啓

不虔法守致速人言尚賴原情姑從降秩馳驅就道跼
躑臨官荷天地之曲成玷鈞衡之平施重叨安便幾至
涕洟補之聞大匠取材無不可施於繩墨中材見遇悉
能自附於功名從古以然惟人所任而補之稟資朽薄
處已拙疎被蒙國士之知塵污文館之選未嘗試用於
一事徒茲廩食者十年羣飛刺天自蔡時而遇合決起
控地獨揣分而退安蓋當庚午之冬即請廣陵之佐居

然充數坐及成資以彼大邦凡更四守既憊愚之無補
又施設之不專乃廢城闈有故亭榭數里而近歷年于
茲至於易弊為新增小使大以職事束於為貳在人情
或所不爭而又考李宗諤祥符之圖稽皇甫湜長慶之
記蓋節使游觀之舊有玉鉤摘星之名郡當水衝人昔
目覩似聞杜牧之句別有雷塘之基明月揚州誰家水
調此詩具在此地可求惟昧周防罔思輟止謂經營不
急實牽連佐守之時然斧斤未加皆成就還朝之後文

檢良在歲月可推非門牆高誼已深察其無它則管蒯
賤生亦安得有今日仍偶去官而會赦乃煩善貸而兼
收第解藩麾旋霑祿養仰聖時之忠厚俯小己以驚惶
斯蓋伏遇某官以道事君推誠與下無私足以助元化
有容足以撫羣倫發為久大之圖馴致中和之盛故寬
罪戾未遂棄捐失官與官從近得近使自為計不過若
斯已幸匿瑕敢同車馬之不受尚為躍冶深慙桃李之
無言固當克謹官箴益修士操信於知己雖後世淺夫

慕義感遇之詞亦不失人蓋自昔君子成功立名之本
補之願不忘舊德常在下風

亳州謝執政啟

以罪貶官偷安為幸因嫌易地得近已多每煩造物之
仁祗劇中情之愧伏念補之本由寒鄙偶在選掄舍矢
盡遲識野麋之至弱運斤不顧知社櫟之無堪同時館
中最下郡守竊謂追羣髦則不足營一職其庶幾不圖
迂疎尚星咎悔量才揣分力如虎以安能計事言功食

無魚而敢歎蓋既釋耒耜而在此則欲去斗筲而向之
賴蒙矜憐不遠移徙斯蓋伏遇某官引君於道附衆以
文方薰陶乎大和以積累於至治故記鬼瑣不終棄捐
某敢不慎跣之傷念鞭其後淹留抑末時疊疊而過中
亮直敢云心怦怦其何極猶有異日寧忘至恩

亳州上李中書啓

夙被採收久知幸會都俞地重敢復恃於門牆竚走位
卑自宜疎於竿牘載寢興而念此終震疊而怛然蓋以

十年之遇未酬一切之儀又闕坐恐魚鳥池林莫還遂
令階庭踵武長埽飄零自力企慕更勤恭惟邇來調燮
燕閒神明勞相伏以某官贊天化育為士宗師學隘困
倉曠山川之受納文非纂繡耿經緯之昭回既剛毅以
有容亦柔嘉而維則此老氏嘗稱君子之盛德抑仲尼
所謂善人之為邦加以遵正考父之益恭兼萬石君之
至慎良法美政世但見於持循密議遠圖中已殫於禪
補要使禮刑達而內敘兵食足而外賓副上主求舊之

心終先朝用儒之効此大雅意寧衆人知而補之幸逢
休明偶脫泥滓亦欲憤發自見毫毛孤植難伸良辰不
與平生狂狷之尚中年期待之私一事莫諧三歎何補
獨竊比漢臣之自誦忘本則難豈徒如魏虜之感恩必
報而去第以賦分薄而造物不能厚稟資拙而匠石無
由工開籠鵠失而始驚捩手羹空而自笑迷塗未返壯
日已賒惟激烈之素懷則蕭條而長在每羞王密謁楊
震之意猶鄙谷永謝王鳳之詞使愚無似有宣光不比

之稱則賢我公乃獻子可賀之舉然而志濶事迂才踈
効遲下若戰國公子之市名當時羣豪之赴義猶可蒯
緱彈鋏預三千客而有魚或能左手捧盤招十九人而
俱歎此自不果它復何言第依庇存姑遠疵悔念虛死
不如立節而止謗莫若自修鶴鳴遠而終聞蘭生幽而
亦佩誠足動金石則有不誠無不動信可行蠻貊則有
不信無不行奔蹠可馴千里要煩於良馭鉛刀且弊一
割更繫於善操重惟左右以主張吾道之公有識拔後

輩之譽取人以恕得士多賢彙茹而升簪履皆在醫門
容疾富績仁鄰寧其中棄之乎既已辱收之矣用此自
信獨無介然若唐兩生奏記當路至願為燎供席蒸芝
効祥顧有義焉何至是也更望日崇令問益被眷圖早
正台衡大庇倫品不惟一士獨荷至私方屆寒涼尚賒
侍省伏乞為上自壽副人所瞻下情無任鄉往傾頌懇
切之至

賀中書韓相公啓

伏自項者初膺眷任入預政機屬時三館之虛已在諸
生之選間因造請似辱收憐然闕門之外已踈而朝廷
之間甚密絕編志墮越俎義慙言不獲伸事無所試上
辜期待分絕激昂既流落於州塵旋顛危於筦庫伏遇
左右卷舒以道從違在公雖均佚於留居尚倚平於世
論慮以罪巖仰玷生成故門牆之間莫修而魚鳥之情
愈濶側聞枚卜峻陟鼎司遐徼同音歡呼共慶即日伏
惟圖國有道自天降休恭以某官剛大直溫柔嘉寬粟

山嶽不動江海有容蹈君子之中庸知古人之出處皇
天祚聖治世立賢煒仁祖之規摹有魏公之風烈大數
已得末流易防一昨初聞命行繼覩章下忠合上慮義
激士心豈惟以千秋一言而取封蓋將試元崇十事而
後入以謂可否分年而異處忠邪指類而並驅米斗至
於千錢民室幾於九去此方今公患之至急與當宁軫
憂之最深廼大臣先已究知則天下夫復何慮然可否
但繫於審訪而忠邪正懼於難分虞氏豈非用大中成

周可謂建皇極既憂讒說之震亦病叨憚之欽嘗聞去
蟻以培隄未有留蠹而蕃木母疾之已甚則固可姑存
而勿論則實難彰瘳不消勸沮迺立理有萬慮行非一
歧同何必親疏豈皆異魏舒始似無取鄭朋初若可通
安得遽知要因久見必使左右皆正直內外無欺誣則
可否自陳於前是非不覈而定成周虞氏迺得庶幾皇
極大中於焉攸敘憂糴卹享尚何足言休兵務農便可
無患然補之處踈遠而謀近懷褻淺而計深亦恃十年

嘗承一盼重念補之稟資頑鄙賦命竒窮勤苦幼能乖
違壯日憂虞晚節摧絕盛時不別不白以得嫌無拳無
勇以蒙垢遭譴遠徙重罹閔喪終止僅存再被竄逐遭
回五六年內往返九千里餘未省蹊田亦遇奪牛之罰
何嘗盜肉猥逢鬪犬之還不死濤淵稍佐民社世當至
德之運人望太平之功拾穗行歌問百年而如此飯蔬
沒齒甘一介之當然豈敢謀身尚懷報主耿耿自信昭
昭實臨更願尊所聞之高明躋斯民以仁壽造次啟沃

終始持循然後朝廷四海蒙遠猷大夫庶士無遺患國
是永建家聲益隆以副上之倚毗以慰人之頌望旅瑣
方困閻高莫親

賀門下李侍郎啓

伏自項者端亮得讒留居均佚旋失芘休之賴即懷顛
沛之憂茫無事倪若有期會滄溟不改歎自蕩之波臣
天雨何心笑流行之木偶單舟將母遠道遘凶忠兼孝
以兩虧影與形而相弔人理斯酷生望莫斬矧未至於

怨仇仍重罹於竄辱實虞罪垢更累已知故卵翼之惠
山隆而寒暄之儀響聞諒惟大雅闕此細圖不然孤生
安取今日再聆柄任增激懼悰伏惟即日鼎燮勞心天
休助順恭以某官江河致遠柱石扶危文能附而武能
威剛不吐而柔不如體和為決以厲濟溫中正而通優
游以法謀議遠而始驗誠信久而後彰故於仁聖之勃
興復以勳賢而首用雲行雨施魚躍鳶飛九重開皇極
之言三事起協恭之慮不為己甚迺見至平民誦斯言

士知此意然有道也由是廣之而補之稟資甚頑賦命至薄駑駕難企龍門誤登墜十五年間挽推已至行五十歲矣跋躄柰何抱瑟自憐毀車欲去奪蹊田尚為有罪況迺初不蹊田赦食馬猶足求功而又未嘗食馬滌器不慙市上受經自所獄中糠覈而肥卑溼亦壽似鴉集者多矣何必更占異雞鳴者有之惟知不應既非意可以遣者亦往事安足論哉第以少嘗妄計於進為老欲不虛於期待屬重光之撫運與百執以同升偶脫濤

淵稍佐民社起死之恩既厚捐生之誓益堅且緣心困而慮衡更識言難而行訥噎因戒食折自知醫審曲則全悟孫以出正爾局促轅下何由穎脫囊中重惟左右學窮象先識際綿炳固曰有容所以大無私謂之王而惟危故能論心非幾何以成務且事有可否易辯迺人有忠邪難分則欲開大中無忽近慮疏豈皆異同未必親袁盎始議絳侯後更獲助鄭朋初通蕭傳卒反見傷若此實繁胡可槩視察就義若渴之故審應問如響之

情借曰比常好先亦意隨必有事造次啓沃終始持循
顯則欲馬不敗羣隱則欲木無藏蠹公是若建朋黨必
消如此而後天下國家蒙遠猷大夫卿士無遺患觀海
恐漫睨柯足知雖未乏戴崇宴見後堂之頃然可無陸
賈微言深念之間竊自比龜智能靈人誠不思蠶飽不
為已乃曹丘顧金掠美則安敢若魯連解紛無取其庶
幾亦有命焉非所期也更望日崇令問益被眷圖蚤正
冢司大庇羣品豈惟一士獨荷至私方戒寒涼尚賒侍

省

河中府謝執政啓

明恩起廢首玷劇曹哀疾便私尚叨名聞盡出鈞陶之
巨賜寧同草木之無知引分每踰撫躬深媿竊以讀書
非無用之具固將圖試而求行事君當有為之時孰不
願知而幸遇賢者奮身而任大中材隨類以効長寸陰
尺璧之匪輕齷齪糧躍馬而恐後又如出部見日去盆望
天所宜欣對亨嘉鮮明注目安有自為連蹇俛默向隅

惟能技之不同故會逢之相邈如補之者稟生至薄涉
世又踈違道德之初心獲聲名而過實畫蛇之足嘗奪
飲而固宜蒙虎之皮或得攻而何怪一昨初湔謫籍即
備史官以半生文字之中而白首江湖之遠忽蒙此選
豈是素期故始榮所得而冒居終揣不能而知止屬饜
為請與郡復優使自為謀不過如是此蓋伏遇某官柱
石扶遠著龜見微直方大以正邦周徧咸而濟物雖良
樂所過絕足為已空然和扁一經沉痾猶皆起將益收

羣俊之助與共底太平之功况補之嘗履閨臺今守民社未負齏鹽之學敢忘卵翼之私

賀許左丞啟

再膺制命入秉政機仁賢類升華夏均福恭惟某官徽猷甚遠廣譽早施文能附而武能威濟之以學剛不吐而柔不茹蓋出於中徇公滅私以退為進故能使兩朝而一節冠百吏而獨先上方總攬權綱詢謀治體務進中和之士以期久大之功民俗利疚之悉知人材能鄙

之素識欽惟圖舊靡不蒙休而補之書生後來曲士寡
與同形骸於樗櫟寄蹤跡於萍蓬伏念門下召還坤維
之年再升鼇禁之日實緣典校嘗莅諸儒眷言賤疎以
備三館不以年輩官聯之夙隔每於勞問與進而甚溫
旋躋廟堂復在甄冶困屢空於甘旨求自効於米鹽似
蒙獎憐不忍棄外藏中心而敢廢報知己以未遑而素
拙少思緣公獲坐尚以頃年之責復更數赦之餘上煩
貸全猶竊安便奪麾符者彌歲徒佐貳者兩邦尤悔寧

追省循已屢長鞭莫及固駕蹇之難驅大厦方成亦飛
鳴而自喜悵坐縻於官守阻趨奉於鈞闕

雞肋集卷五十六

欽定四庫全書薈要卷一萬五千三百二十四

集部

雞肋集卷五十七

宋 晁補之 撰

啟

賀門下吳侍郎啟

誕膺制檢再秉政機已光選衆之求更竦具瞻之望凡
居床廕靡不欣愉恭惟某官致主忠誠濟時賢業寵冠
三朝之舊譽高百辟之前著龜治忽之所昭柱石安危

之攸恃久茲均佚未替告猷聿逢圖任之明復貳納言之重國政弛張之素達人材能鄙之盡知祇賴和衷以成累洽伏念補之稟性朴野賦命竒窮早荐歷於閨臺晚屢更於麾守嘗遭尤悔旋被洗滌皆朝廷及物之私與門牆好士之德尚叨寄委敢怠承宣今川流已復而無虞歲事將登而甚美吏知免咎民識樂生仰大厦之幷蒙固無不訖撫孤蹤之蹉跎當有所歸即日再惟燮理宴閒神明勞相屬拘官守阻造台閔

代上北京韓丞相子華啟

孚告治廷改司留鑰逖聞新命竊忭丹悰恭以某官道
重躬行望隆世濟翊亮四朝之老儀刑百辟之師黃閣
調元意比勞於鼎鼐赤松嘉遯興已傲於林泉屬訪落
之云初固思賢之方急茂惟安集尚輟保釐開府加崇
擁旄增重居然全魏隱若長城伯教素明愛茲崇而敢
伐公歸寧遽有是袞以宜封某蚤誤陶甄復叨庇賴雖
簡書之良窘繫履幕之匪遙幸會居多欣愉倍劇

謝何相公啟

峻騰鼎司誕敷制命嘗致門牆之慶粗申簪履之虔偉
天地之休明曠山川之受納故惟幽介畢獲昭蘇民知
至善之不忘物識太平之無象即日恭惟持國有道自
天降康三接益隆百祿是擁伏以某官剛柔體撰文武
憲邦尊主遠猷隱申甫之維翰宜民善政粵丙魏之有
聲寬足以得衆而惠足以使人深可以通志而幾可以
成務大臣絕傷手之斲小人懷隔面之從本於中和成

此清靜所以不勞施設坐致安榮伏念某稟生拙艱擇
術迂滯以場屋粗知文墨故闈臺誤有姓名然而未嘗
當一事權任一言責是以初從輕坐終獲盪除齒髮衰
齡妻孥滿日晚已無心於事業老猶有累於寒饑及此
分符益知幸會念使功孰與使過况屬盛時儻成仁可
以殺身敢忘異日顧惟遠跡阻望台閣

賀侯樞密啓

光膺褒制峻執鴻樞國有儒臣以裨上治民知聖澤當

復下流相與歡愉固無遠近伏以某官高明篤實寬裕
直方岌然髦士之中夙有大臣之氣果逢盛旦自拔周
行辭章炳蔚足以鼓動四方操節冰霜足以整齊百吏
事無施而不可才屢施以皆宜曾未十年遂登兩府漢
千秋之寤武帝何足慕哉唐馬周之遭太宗無以尚此
洪惟聖主以孝事宗廟思率由於舊章以仁育幅員欲
誕敷於文德務進溫良之士聿求久大之功必有同寅
來膺至眷豈惟精神折衝於樽俎之上固將中和明備

乎禮樂之間而某稟資拙疎賦命蹇薄以塲屋粗知文
墨故閨臺誤有姓名不慮冗材既盈小器故暫膺於識
拔已旋致於顛隳然而未嘗任一事權當一言責用汜
逢於清問遂終削於丹書倘非獲依仁賢當路之餘光
何以克全孤介末塗之晚節重念補之頃親講習又接
鄉邦竊比然明辱知子產敢同貢禹恃舊王陽不能自
躍於鴻臚乃獨長鳴於峻阪盡煩深察更欲何求貧未
脫於寒饑尚資廩入老不愆於忠孝猶累生成念賀厦

之可同悵埽門而無自

謝韓儀公啟

伏念近者特造門牆願親杖屨康寧貌悅千岩松竹之
間蕭散情長一世塵埃之上不覺聳慕膝屈永歎意消
顧蚤預於甄收非敢言於媿婭高明廣逮疏逖咸依尚
憐孤根未必墜雨生芻一束窘窮巷之坐愁清酒百壺
陪後堂之宴笑曾忘禮絕滋愧人微綠野放談過晉公
之高蹈黃花佳唱比陶令之將歸醉猶貸於歐茵狂豈

誅於落帽顏間和氣席上陽春以此使人何人不盡既
貪知己特達勿貳之意遂罄平居深念欲劾之言而莫
戒轉喉幾成捫舌雖禮不禁嫌諱字亦有同音如肇者
和帝名也而漢郡存京兆之稱又操者世祖諱也而植
詩有造日之句載在傳注可以考知乃唐鉅儒若韓吏
部亦著宏辯欲開後疑晉進既殊釗昭不避仰惟大雅
固已包荒然令公以三朝德望之尊而不肖有十年門
下之舊易知罕犯每慎偶踈豈止汗顏真成芒背自違

釣席愈攪蓬心悔訟稍瘳蕪詞始叙伏乞略此細故要
諸後圖間順下風且詢公議似聞芝檢已拜玉音想遂
促於曹裝行復調於伊鼎即日恭惟神明來相寢餗鈞
休補之田野益踈光儀乍阻蕭然形迹失此庇依已戒
僕夫將趨道左庶欲贊輿誦具瞻之意豈獨伸恩閔私
戀之情

泗州謝執政啓

久此投閒初蒙起廢已膺近使更竊名邦荷天地之曲

成玷鈞衡之平施迂踈內揆感涕徒揮伏念某家世久
哀人材甚冗早預諸生之選與從三館之遊羣飛刺天
同時遇合者自其能爾決起控地無庸不足者安所尤
哉幸未忽於省循終獲逢於滌洗退無仇怨寧論三歲
之不興進有盛明未廢十年之乃字里閭浸鄙文法逾
踈顧雖懷遭時有用之心實亦負陳力不能之責斯蓋
伏遇某官忠誠尊主賢業濟時著龜治忽之所昭柱石
安危之攸恃豈惟丙魏有聲於漢蓋非堯舜不陳於王

邦之榮懷必歸其美於上上有大澤必行而致之民災
祲聿消歡謠允塞恭惟挈國尤慎官人敢圖赦過之餘
迺在選能之列泗雖支郡地實控淮舳艫上下以相銜
冠蓋往來而旁午今秋潦收涸而川流底平稼已兆於
豐登吏苟逃於曠失顧承人乏適在此時逢歲有餘乃
幸乞漿而得酒於生無愛尚欲舍魚而食熊誓以肖翹
仰酬造物

代外舅杜侍郎賀姚舍人輝中啟

拜命中宸升華西掖側聞新命預劇懽竊以舍人制
行溫恭修辭敏達夙蘊濟時之業中懷拔俗之情決科
從仕者不四三年閉門著書者踰二十載化行閭里共
畏陳君之知名動京師咸高鄭子之趣二聖垂衣之始
羣才連茹而來首登老成次起遺逸以謂處阨窮而不
愆則宜素富貴而能行議禮曲臺衆果推於適變讎書
東觀士尤服其多聞豈徒居遺闕而抗辭司言動而直
筆雖亟躋於法從已久屈於公才出則代言許劉超之

清慎入而承問倚徐邈之博通朝廷得賢中外胥慶某
早塵近列竊企下風未修牆屏之虔先辱緘滕之貺永
言欣佩莫罄敘陳

泗州謝監司啟

久幸投閒初蒙起廢拜明恩而跼蹐奉中旨以馳驅偶
蒞屬城遂依大庇州素稱於繁會力尤病於拙難視事
云初撫躬以愧伏念某材能甚薄學問又非越自諸生
蚤升三館再更郎選四領藩麾惟被譴之獨輕故滌瑕

之前逮付以要郡俾其赴功野鹿情踈念蒿華而常在
疲駑氣索見車蓋以內驚伏遇某官寬厚愛人公忠莅
事提封一路檢察百城仰惟攬轡之邈然孰不望風而
惕若更願小寬檢策稍假歲時必有毫釐自圖報稱官
守所拘不獲趨候謹啟

謝泗州倅曾承議啟

恩俞守郡幸會同僚平居想望之深今此從遊之便伏
以某官賢猷開濟雅趣靖良事業藹其家傳聲名藉於

衆口方紆佐郡良屈遠猷然而素履允修撫謙更篤宜
入預清華之選寧久從闕決之勞惟此拙難劇於延跂
歌襦袴之慕深愧非才詠海沂之康終煩敏手方圖馳
問遽辱惠音黼黻之辭蔚然累幅哀顏之質煥若增輝
展晤非遙欣愉可既

謝泗州教授啓

比蒙恩檢改莅近州悵馳問之未遑辱流音之先及眷
言披玩但極感銘伏以某官早擅俊聲躋登科第偉該

通之經術煥藻麗之文辭暫屈討論亟躋要近某哀遲
假守邂逅為僚敢辭奔走之勤行有晤承之便方茲殘
漚更厚自持

荅賀直閣林次中啟

升華內閣增秩列御雖揚歷之固宜亦東掄之寔重竊
以冊府之設非止於藏書文館之名固先於延士大則
典領謨述或次補法從之崇卑而是正按讎猶擺落常
流之賤嘗思所以置此之始又念所以待之之殊豈欲

虛名相矜而徒以廩食養於燕休深廬默坐而不聞
朝廷議論之毫末世務既趨於一切書生亦習於自輕
迨茲陵夷最號閒冷聖明繼照員品復修方將敷求久
任之俊良稍以敦勸方來之遺逸猥同聲氣預有光輝
恭惟某官少以藝文早收科級本於高才達識之自致
濟以彊學好問而旁通明白不私敏捷立斷事每試而
皆可居所去而見思爲府郎曹屢更於繁要蘭臺都省
稍陟於高華果奉明恩更躋祕職猗歟父子之相繼謁

然兄弟之嘉聲儒者之榮衆人所慕行超騰於近列益
開發於遠圖致主之功計日以俟補之備員中秘絕企
後塵乃蒙齒記常僚講修故事交馳牋牘慙輩行之非
宜臧置縑緗傳子孫而為好

謝龍圖吳雍薦論啟

陳編窺竊何補諸生華袞裒榮敢煩一字誤蒙代匱祇
劇厚顏補之稟生既愚聞道亦淺少日狂狷頗復激昂
長年艱難稍亦咎悔不幸先子蚤棄諸孤居然為貧初

此求仕賣刀買犢行藏獨可以自期觀頤舍龜失得不
足以相補竭來泮水三易歲華無它時捧檄之勞有平
居肄業之樂譬彼倦鳥聊復投林坐令摧頽滋用迂闊
風雨子桑之席促軫屋穿蓬蒿仲蔚之園披書案朽間
偶好事惠然晤談務閒偷安考滿當去豈圖過聽乃此
誤加謂鳧足非長而雞肋可惜收置門館論諸朝廷此
蓋伏遇某官高才得君強恕待物統綏一道刺舉百城
如般之運斧斤曾微擁腫若良之操轡策安有疲駑曲

憐孤生為借餘潤昔張安世不樂私謝而李習之嘗賦
感知趣非不同義各有處更願寬其不及須以後來豈
無毫釐可卜報効

高麗人使回遠迎狀

伏審航琛入貢館飫言歸瞻九雉之崢嶸夢回天上指
三韓之縹緲色見眉間候袂來聞使軺將及參承可卜
欣抃良深

謝高麗使送人事物狀

茲緣迓勞初獲晤瞻入覲日畿慶賜牽之成禮言歸海
國辱展幣以交驩盛意難承珍藏敢置

送高麗使副人事物狀

州僚備位郊犒常儀蚤欽俎豆之風先煩委贄願報瓊
瑤之好敢廢實筭薄物將誠別封具列

北朝國信大使先狀

茲者歷紀歲端禮欽鄰問眷使軺之于邁幸候館之可
休冒涉寒威又寧福履趨承良邇欣詠徒深

雞肋集卷五十七

欽定四庫全書薈要卷一萬五千三百二十五

集部

雞肋集卷五十八

宋 晁補之 撰

啟

與謝寶文啟

竊審再膺宸檢還鎮淮邦副朝廷因任之求慰民吏去思
之意伏惟歡慶恭以某官忠蓋者德文詞宿儒蚤記淵
衷徧躋法從長人京邑豈徒前有之趙張控虜藩垣真

是禁中之頗牧惟江陽氣俗之舊有棠陰惠化之餘農
絕帶牛尚未忘於勸課兒騎竹馬願復見於行春惟暫
屈於統綏固不勞於經理而補之倦游文館得請佐州
曾未造於門牆將獲依於麾棨自惟幸會尤劇欣愉方
冬沍凝取道遼遠

謝淮南潛彭元施啟

吏能何補公舉過優迂疎內循光價已倍伏念補之無
自得之學非適時之才間闕一名龜俛十考庠校五歲

館閣四年不能穡而取禾退默既慙於素飽未操刀而欲割進為又懼於得傷故嘗冒請於外官庶幾自試於民事而託部封之未久辱咳唾之獨先靜言思之何以得此斯蓋伏遇某官忠以事上恕於取人過譽斗筲俾參瑚璉李長樂之許文舉非為通家暴公子之知不疑倘緣一語人之幸會勢豈偶然誓堅許國之心終得報恩之所感荷激切不知所裁

與京東漕黃朝散啟

伏審祇膺眷擢榮揔漕將已擇剛辰初臨治部伏惟慶
慰恭以某官才高當世聲發妙齡行誼規於古人文章
固其餘事鴻干以序美既載於兩朝玉立而溫威自宣
於百郡屬河朔流移之始復而山東罷瘵之未蘇庶幾
小豐有望卒歲故暫假問民之寄豈久迂攬轡之行補
之項濫麾符方茲譴謫何意周旋之舊乃依刺舉之嚴
舍曰蘇孺文之天迂疎敢有或者李將軍之地寬大所
為非輒病於至公實少伸於知己永言幸會莫罄敘陳

答謝華守趙子剛賀入館啟

頃者効官河外託庇府中違離屢易於歲華傾想第勤
於魂夢疎慵成癖問訊闕修伏惟坐鎮安閒履時休裕
補之才能甚薄學術亦迂比緣明詔之求偶用輔臣之
薦道山羣玉之地濫跡莫遑長林豐草之思此心固在
斯蓋某官忠信好禮彊恕行仁吹噓所加隱伏皆奮蓋
嘗勉裁尺牘概敘鄙誠置几塵生開緘字減既後時而
莫致滋撫事以為慙乃蒙眷私特枉慶賀辭極璆琳之

美情踰骨肉之親顧惟感銘尤劇衷悃新元肇布介福
來同

與亳守向宗旦啟

頃緣契援嘗奉標儀去牆屏之已賒託麾符而深幸恭
以某官溫良植已忠蓋在公勲名烜赫於相門嫺戚蟬
聯於帝室不由此進自以才稱騫翔省寺之華更踐藩
垣之重居有善政去嘗見思而補之踈拙領州乖違得
譴未更歲律仍避親嫌仰寬大之足依俯飄搖而自慰

奔馳敢後參對可期

上河北漕呂進伯所業啟

草木有榮逢春乃耀鳥蟲含響得氣則鳴物誠甚微情
乃如此士有知識志宜激昂自憐孤生誤喜末學執技
不化知己益消寅緣官曹統蒞使部竊以畏大人於早
歲事君子於一朝向塵長趨人進亦進登堂危坐衆言
則言不圖高明見假顏色問訊所學開擴其愚昨成至
言所要知道退念空語滋不欲陳然而殫廢楮毫棄滯

箱篋憤懣已吐蕪蔓莫刪猶望牛歌足觀蠅墨可綴察
鄙心於甯子成拙繪於曹生則雖孔門未廢由瑟尚或
有取不為無庸

代胡唐臣授蘇幕與使者啓

比者忝命宸廷備員州幕仰威容之固久託封部以為
光竊自思惟良深幸會伏念其才出中下譽乏鮮明雖
任使之粗更顧毫毛之未立祇惕譴尤之後摧頽禍罰
之餘豈敢進求智挈餅而安取庶幾分守恩弛負之已

多此蓋伏遇某官忠以事君恕於接物蕭生論議寧忘
意於本朝范子澄清蓋有心於天下寅緣竊食邂逅望
塵捧檄束裝計官期之良邇登堂聞教况吏政之可師
欣忭之情倍百常品

授澶州司戶荅韓諫議璫請充教授啟

竊以貴賤位殊義非均則有所不荅賢愚術異勢既絕
則無以相求蓋明公在上之達尊而不肖衆人之晚遇
解褐一命從軍大邦以未嘗知名而過聽獨收故不待

望履而陳書犯分罪實出於不避誅宜獲於非常敢謂
伏蒙某官寬裕有容威嚴曲霽猥以世間之盛禮施於
麾下之鰥生屈記室以裁牋賜家童而返報往來嫌於
敵體進退越於常倫愧汗莫堪駭情無措炳若文章之
眩目昳然藜藿之驚心上煩開府之知下無國士之稱
至於假資助乏輟蔡代徒自惟平生得此固寡三復敢
置累息弗寧蓋補之才實竄疎學尤拙陋幼雖有志壯
益無聞幸邁明昌預霑教養庶幾同小子之有造未敢

與先生而竝行正使米鹽効勤猶病弗稱若復庠序肄業尤非素長伏况門下德誼之最隆府中衣冠之甚美鄒枚毫牘之侍應劉樽俎之陪足以議論古今酬酢左右豈宜下陳無似之賤吏乃辱大人當路之末光拜教至榮拊心益忝請自隗始私不忘築臺之初即以遂行尚或有奉盤之頃斂板就列計日有期託庇門闌終身悃悃惶懼激切之至

回鄆城孫簿啓

麋鹿情疎但記蒿苓之樂鷓鴣跡遠無心羽翮之追忽
被除音復叨守土髮星星而久墮綬若若以增慙敢圖
眷獎之淡首辱緘題之慶徒欽雅致夙越常流偉初奮
於仕塗藹已揚於才譽身相為援豈無用力之公卿意
獨與親乃在退藏之農圃將高懷之固異實近世之所
稀補之自信良堅與庸已甚枉瓊瑤之為好撫蓬窳以
生輝感荷之誠倍百常品

賀教授陳履常啟

擢領掾曹歸臨鄉校與從游之良舊私慰喜以居多竊
惟國之求才病取捨之膠於法士之涉世患進退之失
其中設科舉爵位以誘人假誦數詞章以干祿須其出
試則鄉黨自好者恥夫屢獻不以禮際則山林長往者
豈其肯來故上安於有司之區區糊名以為公而士惑
於古人之皇皇載質以為辱莫聞覽德之鳳率多食餌
之魚恭以某官行獨而通志潔而降不落落以如玉矧
泛泛其若鳧窮無立錐術可濟國至於博覽之學絕出

之文要其平生固曰餘事尚不屑去安有求聞聲自籍
於諸公章數騰於當宁拔起閭里朋類之榮收還妻孥
親黨所喜未促公車之詔聊從泮水之行庶觀成山必
自累土辭尊及富仕何往而非安有為與行志苟存而
皆可貽賤良幸修慶獨稽傾詠之誠倍於儕等

荅謝狀元李常寧啟

擣詞中禁擢秀羣豪一鳴而驚閭里爭傳於盛事三道
之要朝廷相賀於得人伏以某官藏器於身待詔而往

文非時好近灑壘之商周經本心通無異同之王鄭囊
錐出穎郵傳馳聲望冠蓋以傾風固其素願過蓬茅而
委質非所宜堪豈徒一戰而稱雄庶觀千里之自此忻
愉良劇敷敘何窮

荅謝宗室奉議啟

程文入等恩詔換官起身玉牒之華通籍金閨之貴伏
惟慶慰竊以邦國之建本支是崇變商餘風周化行於
麟趾懲秦孤立漢勢定於犬牙豈徒魯衛兄弟之俱賢

固宜向歆父子之間出逮觀近世莫盛李唐持鈞軸以
當朝適之首出以文章而傳世長吉獨先聲明迄今想
像未泯恭惟聖世尤篤宗盟惜夫飽祿廩而宴安故使
學詩書而進取及茲歷歲寔得聞人新恩奉議稟性茂
良修詞敏劬恥從派屬輩居環衛之中欲以功名自致
薦紳之上果緣藝選驟改文班同列相矜一時盛觀竝
騫騰於夷路益開發於遠圖先枉緘封過形謙挹感銘
良劇敷敘奚殫

荅賀李祥改宣德啓

延對宸廷改榮京秩從游茲舊慰喜良多恭以宣德懿
行不羣令儀可度粵從幼學夙有俊聲下帷未省窺園
持竿寧悟流麥其精如此故資之深珠玉蘊含山川輝
媚自當名世豈獨傳家補之氣合相求心均莫逆緝緝
洗之何取樞株枸之自留臨水送將牛羊方下望風懷
想鴻雁欲來庶幾逢聲子之班荆且復過孟公而投轄
未遑馳慶先辱流音尚阻盍簪惟期彊飮

荅亳州趙教授啟

茲緣罪譴復避親嫌跂才譽之素勤聯官曹而深幸恭
以教授推官端良可度超犖不羣早收科第之榮方莅
膠庠之秩粹精古學本自得於下帷敏捷高辭咸相傳
於倚馬操惟幽而不改聲乃大而遠聞倦飛聊比於一
枝築室尚容於三徑先煩慶問尤認眷私感服忻愉併
增誠悃

太學荅學生林自啟

竊審論秀辟雍登榮造士伏惟慶慰上舍先輩懿行可
度美才不羣負笈徒行豈辭李固之千里違親忍志末
厭何蕃之五年故能通達大成文史足用升諸鄉而有
素告於王而可官以補之預在膠庠特貽牋翰推先非
據感服徒深

荅王勲謝貢啟

數從升補初預賓興雖學制之同然必鄉評之所與竊
以貢士先輩幼稟雋異早勤編摩敏七步之修詞飽五

車之疆記李廣百戰未立寸功何蕃一歸動輒累歲阨窮已甚操守更堅果緣考察之公往借造秀之選國有道化方革浮華士惟忠良乃稱推擇九層始於累土一鳴可以驚人豈但顯親固將行義願思飯粟務正學以言而發身毋侈輜車稱稽古之力以辱士先承緘翰但劇感銘

謝陸倕啟

輟自班聯屈臨州郡涓辰之善視事云初伏惟慶慰恭


以某官經術博通文詞敏贍賢關論秀早成金玉之章
卿寺須才久躡鷓鴻之綴英猷方顯雅致不羣自求外
官欲試民事聳聞交印已揚慈惠之聲即見賜環復在清
華之選補之田閭託跡萍梗因風當趨牆屏之嚴以伸
桑梓之恪屬茲被命既迫赴官愧流問之辱先悵參承
之莫遂

雞肋集卷五十八

謹案卷五十七第二頁前三行儀刑百辟之師刊
本刊訛形據詩經改

第十一頁前四行高麗人使回遠迎狀刊本脫狀
字今增





總校官庶吉士臣張能照

校對官編修臣曹城

滕錄監生臣鄭嶠

欽定四庫全書薈要

集部

雞肋集卷

五十九至
六十一

詳校官助教臣謝登雋



欽定四庫全書薈要卷一萬五千三百二十六

集部

雞肋集卷五十九

宋 晁補之 撰


赴揚州上太守王資政正仲啟

比者得請宸廷備員州佐早在陶鈞之內久辭牆屏之
巖蚩緣庇依欣喜幸會恭惟某官道德世範文詞儒宗
龍虎之得風雲主威益重山淵之有珠玉國勢增華加

以仁厚不矜直方有體倦經為於機政思宴息於藩維
而補之冊府後來書生孤立慙梧鼠之五技窘侏儒之
一囊江海之思日縈魂夢麾符之陰與有光榮春水已
生吳艤當具尚曹裝之未促儻苟御之可容鄉往之誠
倍百常品

與交代范峒啟

蒙恩外補承乏後塵惟慕誼之素勤獲趨風而自慶恭
以某官夙懷賢業藹有令名行已不撓而衆推居官所

至而民願尚淹器幹屈佐藩維補之質薄自憐學迂寡
與陪英髦於中秘非所宜堪奉甘旨於宴閒蓋其私便
企青雲而雖舊繼白雪以良難行造門牆粗窺矩範欣
愉幸會悃悞奚殫

與淮南提刑賈殿院啟

蒙恩外補竊祿便親望履幕以良勤去門牆之未久敢
圖官守遂在部封恭惟某官道業古人之期風聲列位
之冠以義出處繫時重輕雖雅意不忘於本朝而直諫

自難於居內久傾公議尚屈遠猷補之質薄自憐學迂
寡用糜丹鉛於冊府固乏毫釐佐條教於藩城足殫駑
蹇趨參良邇庇賴為榮瞻詠欣愉併深悃悞

與淮南監司啟

蒙恩補外竊祿便親仰風望之素隆傾誠心之固久敢
圖官守遂在部封恭惟某官賢業藹聞公才屢試奉行
寬大之令威亦暢於屬城愛養疲瘵之眊財不虧於成
賦尚淹使指行副褒延補之質薄自憐學迂寡用糜丹

鉛於冊府固乏毫釐佐條教於藩城足殫駑蹇趨叅良
邇庇賴為榮瞻詠欣愉併深悃悞

荅揚州教授曾旼啟

此者請外便親蒙恩佐郡往歲周旋之舊彌年契濶之
懷又此從遊良為幸會恭以某官精智洞物高才邁羣
倚相讀書博洽窮於世表正平作賦敏捷出於坐中科
甲先登名譽早立當居要近寧久宴閒補之自以拙艱
安於疎逝青雲魏闕初驚日月之遙春水隋河已夢江

湖之上聊復爾爾慙為米之淵明于時言言喜班荆之
聲子清和在候導養適宜先辱音題尤增感刻

上揚守王正仲啟

近承恩檢叨備府僚嘗貢郵牋僭塵台几敢謂謙尊之
盛德曾無疎賤之遐遺飭書記以染修付候兵而傳致
獎收踰分感愧并心伏審得請過家方春展墓散黃金
之百鎰見白髮之故人鷁舟歸濟於晴江虎節還臨於
治部即日鎮撫多暇神明用休補之早被陶甄久辭牆

屏載勤舟楫奉甘旨以知榮適及郊圻聽歌謠而自慰
意行調於元鼎難久託於後車用此傾馳不忘魂寐清
和當候拜伏可期

與淮東提刑王司諫啟

被選中宸改臨東部獲趨風之良舊思去德之未遥側
聆除音尤喜幸會恭以某官學術知古才謀適時直節
在於諫垣能聲聞於省闈訪民恫苦姑暫屈於登車副
上獲延已久虛於前席補之才質人後趣操衆違比緣

將母之求偶遂佐州之請敢圖官守預占提封庶自竭
於疲駑漸永依於庇賴欣愉鄉往併劇下情

荅揚州判官趙奉議啟

辟書畫可賓幕改除惟跂慕之素勤獲從游而私幸恭
以某官美才自立佳譽藹傳鳳穴一翰殊有超宗之質
龍門獨上早膺元禮之知念契濶之未遙辱音題而尤
喜炎歊方熾款晤可期

荅致仕劉敏大夫啟

竊啟風聲未親晤語枉書郵之先貺審舟御之將臨即日順履凝嚴茂迎福祉某官賢誼甚美公才素高浮榮如過於蚊蚋苦節自期於松柏幸緣寓止當遂從游載惟欣慰之多非復敘陳之究

與京東漕張道順啟

念趨風之良舊復去德之未遙遂託部封實為幸會恭以某官博學知古通才適時揚歷省闈名獨高於羣彥從容使指威自聳於屬城方聖政之又新豈賢猷之久

屈補之內慙竊祿自乞試州歲比不登民逃未復撫循
有道在躬守於詔條施舍不煩可面承於教約炎歆方
熾參奉有期

與京東提刑趙景仁啟

光膺帝制出領使權已次封圻初交印節伏惟慶慰恭
以某官高才敏達雅操靖嘉玉立班行固朝廷之妙選
風生羣聽藹臺省之休聲尚屈遠猷俯臨一道行著澄
清之績亟歸侍從之華而補之請外便親得官屬郡竊

伺張旌之邇將申守土之恭欣抃之誠倍百常品

荅淄守啟

去闕廷之伊邇弛負擔之云初畫界相望親仁良幸補
之世家單系冊府後來文無取於將明武不足以捍衛
每自慙於索米姑求試於長民伏遇某官忠藎事君中
和布政顧何功於製錦竊自喜於分光未暇染修先承
慶問感銘殊厚敷述難窮

與淄倅啟

著述寡功迂疎畏罪輒自陳於將母偶得請於為州敢
圖弛負之初乃辱馳書之貺感銘殊厚傾詠益勤恭惟
某官懿行溫良公才敏幼題輿以俟偉仲舉之高名投
傳而歸小巨卿之獨操宜入聯於省寺寧久困於簿書
而補之曩昔官游寅緣晤接回首十年之舊相忘數舍
之間尚阻合并重增鄉往

與提舉鄭彥能啟

頃寓都城偶連牆仞自惟疎拙方力請於郡章亦值

高明。出宣於使指幸趨風之頗數復去德之未遙間
關行路之勤倥偬交符之始仰依大庇內激愚衷伏念
補之素不逮人猶知信己少時薄技誠何取於屠龍長
歲虛名固無堪於挹酒窘中塗之蹇跋賴十手之輓推
矧在仁賢最為知舊當法令再行之際屬疲駑承乏之
時庶幾平均未廢詢採恭惟某官忠以事上惠於撫民
嘗力學夫古人知為政之大體清河恃孺文之故敢有
是心渤海遇勝之之賢儻緣今日官曹冗甚書牘闕然

尚阻參承重增延跂

與京東漕呂直父啓

被旨中宸改臨東部凡居庥庇舉集欣愉恭以某官業
履忠純才謀敏達當先朝之慎東在羣俊之上游使指
屢將守麾荐擁居有顯効去常見思方聖政之又新豈
賢猷之尚屈而補之自惟踈拙頃辱交承復幸提封獲
依刺舉惠留多袴民借寇以無由威暢連城盜奔秦而
先改趨參甫邇頌詠尤深

荅滑守李孝純啟

久託姻盟未親賢度一麾假守釋負擔之云初千里贈
言想音容而如接媿慙既厚欣喜并深恭以某官懿行
自將高才挺出蚤踐揚於要宦方烜赫於能名列戟映
門固大家之流澤褰帷行部有循吏之遺風側聆交符
幸此授館將獲踵門求見之便以慰慕義無窮之心契
濶未間傾馳尤劇

賀知府趙待制移鎮啟

光被制書改司京鑰凡居庠庠舉集歡愉恭以某官中
正而通優游以法蘊經邦之遠業在志學之妙年入奉
清光文采昭回之上出臨方面折衝燕笑之間自當綱
紀朝廷訏謨帷幄尚茲均佚咸謂非宜補之疎拙守藩
乖違得罪敢圖恩宥乃佐留居仰大厦之足依俯孤蹤
而自慰妍和取道順履逢休

謝提刑上官正言啟

奉法不虔蒙恩薄譴何意拙疎之跡乃依刺舉之嚴莅

事云初省躬淡幸恭以某官風猷甚遠德操不回學蓋
在於誠身仕不斲於遇合少馳妙譽蚤掇上科夷考平
生實皆餘事尚出將於使指行歸侍於禁垣而補之樗
朽無堪萍蓬惟寄去門牆之滋久備官屬以為榮收堂
下之言雖仰煩於大雅効囊中之穎茲方窘於末塗更
願須以歲時寬其轡策庶幾報稱可積毫釐感愧之懷
倍百常品

留臺韓朝請到狀啟

奉法不虔蒙恩薄譴敢圖佐守遂隸分臺眷言離索之情獲此從游之幸恭以某官慶傳累世譽滿本朝子產知然明之心殊非今日文舉待正平之少固與忘年馬伏櫪而長思萍因風而相值人生投分勢豈偶然念布敘以未遑辱音題之良厚欣愉感荷倍百鄙懷

荅維守啟

自以拙艱安於踈逖抗章得請交印云初傾心德誼之勤引領疆圻之邇願馳書之固久特櫻事而未遑恭惟

某官慈惠為春清明可鑑帶牛緣畝不但格於頑民渡
虎去封已先柔於異類將入補公卿之缺豈惟錫車劍
之榮慙製錦之難工幸分光之無損首貽慶問倍荷眷
私屬守郡符阻親履幕

揚州泛用賀冬啟

銅儀軫轉肇南陸之景長緹室飄颻知黃宮之氣至人
惟剛德天與介休恭以某官篤實方中柔嘉暢外世大
來而小往時陽息而陰消用此進為孰量事業悵坐縻於

官局阻趨慶於賓墀欣頌之誠倍越常品

元日賀啟

羊雞被惡導四氣之始和椒栢泛醇薦百年之難老惟
人視履與物咸新恭以某官中正以通榮嘉維則入陪
嚴禁屢輸竭於忠猷出總連城暫布宣於惠澤順迎端
月茂擁介休悵拘繫於郡章阻參承於戎幕永言善頌
數倍常情

元日賀啟

羊雞被惡導四氣之始和椒栢薦醇介百年之難老惟
人視履與物咸新恭以某官中正以通柔嘉維則佩牛
還畝知警夜之可虛竹馬迎郊想班春之方暇順迎端
月茂擁殊休悵拘繫於郡章阻參承於賓幕永言善頌
數倍常情

荅交代中散啟

拜恩中禁假守瀕河念仳別之尚新獲交承而自幸恭
以某官德誼粹美材猷敏彊久東在於班聯暫屈臨於

刺舉將聞顯用諸大夫皆曰賢固有規摹舊令尹必以告未遑修問先辱流音參晤可期欣愉良劇

與李中大啟

倦游郎省得請藩麾平居慕望之勤今此晤承之便恭以某官德履端潔才能敏長學穉齒而蚤成志耆年而彌劬踐揚臺閣蓋政事之猶存穎脫雲泉固風聲之可尚馳書尚闕流問辱先傾蓋足榮驅車竊抃

謝呂大夫啟

請外便私蒙恩補郡去闕庭之伊邇弛負擔之云初問
俗何先聞風增慕補之世家單系冊府後來文無取於
將明武不足以捍衛每內慙於索米姑求試於長民伏
遇某官脫略軒裳燕居里第顧何功於報國竊自喜於
親仁未暇染修先承榮問感銘良劇敷述奚殫

荅通判朝奉啟

得請宸庭出分郡寄惟傾風之素切偶聯事以為榮恭
惟某官德誼致修聲猷自奮揚歷閨臺之舊回翔藩閫

之游咸謂非宜安能久屈庶幾有政賴別駕以不空固
願無何如淮陽之高卧參承良邇欣幸尤深

代韓太中賀徐中丞啟

躋榮螭陸進總霜臺恭惟慶慰伏以某官天才俊良神
氣宏偉起于磐之鴻漸為溟海之鵬搏操行古人之期
謀謨當代之映賈誼之遭文帝千載所難馬周之遇太
宗一言而合亟任掌綸之選迅陞專席之雄光華儒林
洋溢士論側聆新命俯愜素誠限繫外官阻申慶謁永

言欣忭曷罄敘陳

與淮南監司啟

罪譴佐州親嫌易地倚門牆之良舊託封部之云初內
顧迂疎尤深幸會伏念補之少而孤立壯不適時誤貼
職於書林本無學業濫承流於藩郡祇用資塗敢攀鷁
鵠之高嬉自笑銚鑿之易滿黑生白犢寧論無妄之災
醜效美顰宜取求全之毀賴聖時之忠厚俾愚分以便
安每自揣循惟知憐惕伏遇某官至誠樂育大雅不羣

金方口人
卷五十九
恕常用於一言威自行於千里尚寬刺舉小假歲時儻
不重於悔尤或粗收於毫末

謝解啟

伏覩解榜偶被薦送者迫疆敵以當前初虞逐北挈孤
軍而冒戰遽預先登進叨非據之榮退積循涯之愧竊
以治非一道三代之所同功學非一師百聖之所並字
更末流於淺鮮之後追大本於芒忽之為五官猶具於
天根六鑿未仍於物偽行義忠信粹乎常得於固存言

語文章卓然皆出於可用教化之所被及風俗之所影
隨中國無異於四方野人知學於君子王者之迹未熄
古人之體尚存少變而為晚周大壞而為戰國處士以
詖行自售公子以得人相傾離騷濫於辭章兵法窮於
威武禁游說者縱橫以辨顯任使者推理以雄俗僻則
吳越無秀民志竒則鄒魯無異行陵夷百世鹵莽一塗
漢泐秦餘而莫醇唐因隋舊而未善際真人之撫運混
雜霸之餘墟英宗廣於規模仁祖備乎文物今上闢圖

書之府重禮樂之司息誦數為腐儒廢雕蟲為土苴奮
乎百世之後覩此六經之難以是取人謂宜得士如補
之者拙非世用僻與衆違有轉喉觸諱之窮無炙手可
熱之助流離百狀辜負寸心搢紳之所未信而無庸鄉
黨之所共輕而竊笑踽踽自守無意於舍龜張張何從
迨同於即鹿亦嘗側聞長者之論庶幾得上君子之堂
十載屬文七年論學蚤濫舉首輒困退飛託患難之餘
生守迂踈之舊習仰箕裘而莫繼俯蓬甕以增羞望絕

亨嘉分投窮籍詩常招隱書或絕交它人誚其逆施智
者以謂非異不覺歲月之易失竊省功名而自驚遠舉
何為聞虛絃之已怯相忘可樂忘芳餌以復來然而學
不能偶當世之方圓材不足當大人之取舍儻俛自力
孿拳莫堪一字固微屢經營於燥吻萬言良富愧滂沛
於搔毫尚賴庶明過辱題品掇其片善躋以上游斯蓋
伏遇某官大雅不羣至誠樂與譬之水正錯而不動與
夫衡誠陳而不欺有形焉得而苟藏無物不可以自試

故容最陋亦預甄收某敢不增益淺聞激昂壯節鵬搏
有待固未忘九萬之程狗盜為功猶不愧三千之客

公為求親啟

慶長舊望雖懷齊鄭之殊投分明時實許晁張之並輒
恃斷金之好曾忘倚玉之嫌仲孺姪孫吏部長男公為
不逮於人粗教以義伏承賢弟龍圖位第十一小娘子
閭儀世幼女美幼聞妾伸納采之誠私幸宜家之慶不
忘故分終惠好音

送幣啓

近者輒布私誠仰希高援愧山川之能受報金玉之好
音不鄙單平更篤盟好及泮水之未幾羞東鹿之惟時
念孔李之通家寧慙於舊庶媯姜之五世殊未可量永
言欣愉莫罄陳叙不腆禮幣具如別牋

公似求親啟

通家奕世如蘭未喻於夙心繼好諸孫投李敢期於厚
報載敦合姓敢替問名伏承某人女善慶所鍾德容兼

茂其人男屬方幼學期以成人男既彼甥女惟此出契
援踰於他族禮律可以通昏鳴鳳其昌已篤媯姜之舊
同車信美不遑齊鄭之嫌跂望良勤好音無悶

代謝求親啟

近枉行媒特傳嘉命高門絕企實懷賈詡之私見子良
勤願附王謙之義仰慙眷厚敢布悃誠伏承某男蚤聞
俊良自立孝悌無綺紉餘子之好有詩書寒士之風某
女方妙年齡未閑警戒采蘋南澗雖法度之可追如舜

同車顧德音之未著承言感佩難遽遵承

許親啟

比念鄙宗難攀高援輒布敢辭之義重煩同好之言詠
魴鯉之詩雖有慙於齊宋思冠冕之胄誠竊慕於崔盧
矧繾綣之已勤欲逡巡而安可願言託附實有光榮感
刻良深敷陳莫究

送幣啟

疊煩信紹申篤嘉盟煥然純帛之儀寵以問名之耗蘿

施松栢後方昌而莫與京桃報瓊瑤物雖薄而用可重
不腆實篚具如別牋

求親啟

台鼎高門金蘭重義已幸趨風之舊矧煩繼好之修令
弟某官制行孝恭稟資英爽幹蠱優於用譽視履宜於
考祥某房第幾孫女蚤慎閨儀粗知婦教乃求葑菲俾
結絲蘿承命愧慙披詞榮耀竊欽慶善方膺五世之昌
輒昧單平願布一言之諾其於銘感豈盡敷陳微物將

誠具如別幅

雞肋集卷五十九